

DIREKTIV TIL PARTIAVDELINGSSTYRA OM KONTINGENTEN

Dette direktivet gjeld frå 1. februar 1978.

1. Kven skal betale kontingent?

Ifølge § 1 og 4 i vedtektene skal alle medlem/kandidat-medlem betale medlemskontingent til partiet.

2. Når skal kontingenten betalast?

Kontingenten skal betalast kvar 4. måned rekna frå 1/1. og skal betalast på etterskot. Partiavdelingsstyra og distriktsstyra er politisk og organisatorisk ansvarlege for at kontingenten frå medlem og partiavdelingar er kravd inn til dette tidspunkt.

3. Kva er medlemskontingenten?

Kontingenten er delt opp etter følgjande fire satsar:

- sats I: mellom kr. 20 og 59 pr. måned
- sats II: mellom kr. 60 og 99 pr. måned
- sats III: mellom kr. 100 og 149 pr. måned
- sats IV: kr. 150 eller meir pr. måned.

3.1. Sats I

Arbeidsløyse, trygdede, husmødrer, lærlingar og skoleelevar og andre med årsinntekt under kr. 30.000 kan betale mellom kr. 20 og 59 pr. måned.

3.2. Sats II

Medlem/kandidatmedlem med årsinntekt mellom kr. 30.000 og kr. 50.000, normalt og studentar, skal betale mellom kr. 60 og 99 pr. måned.

3.3. Sats III

Medlem/kandidatmedlem med årsinntekt over 50.000 skal betale mellom kr. 100 og 149 pr. måned.

3.4. Sats IV

Denne satsen er for medlem med særskilt god økonomi og som har høve til å betale over kr. 150 pr. måned..

3.5. Fastsetting av kontingenten

Kontingenter for kvar einskild medlem/kandidatmedlem skal fastsetjast etter ein diskusjon om den økonomiske evna. Diskusjonen bør ta utgangspunkt i årsinntekta, men andre tilhøve som verkar inn på den økonomiske yteevna som t.d. boutgifter, gjeldsbyrde, forsørgjarbyrde osv., må inngå i vurderinga.

Vurderinga av kvar einskild si reelle økonomiske evre er overordna gradering etter årsinntekt. Diskusjonen bør oppmuntre alle til å betale så høg kontingent som råd innafor satsane.

Avdelinga må vera smidig ved fastsettinga av kontingenten for den einskilde. Føremålet med ulike satsar er nettopp å ta omsyn til ulik økonomisk evre innafor partiets medlemsmasse, og gje rom for at medlema/kandidatmedlema kan betale så høg kontingent som råd.

4. Kven krev inn kontingenter?

Partiavdelingsstyra skal krevje inn kontingenten frå sine medlem/kandidatmedlem.

Innbetalinga bør skje kvar månad forat kontingenten ikkje skal hope seg opp til ein stor sum ved kvar innsending, og i starten på kvar månad slik at avdelingsstyra kan overhalde frister for innsending.

Distriktsstyret eller sentralkomiteen krev inn kontingenten samla frå dei einskilde partiavdelingane. Deretter skal kontingenten vidare til sentralkomiteen etter ein særskilt instruks.

4.1. Partiavdelingsskatt

Partiavdelingsskatten utgjer inntil 10 % av den totale kontingentsummen og skal gå til drift av avdelinga. Distriktsstyret kan gje dispensasjon frå dette med inntil 20 % etter søknad, utover dette kan sentralkomiteen gje dispensasjon.

Avdelinga bør fastsetje trekkprosenten sin etter eit framlagt budsjett slik at avdelinga ikkje trekkjer meir enn det som er naudsynt for avdelinga si drift og slik at han kan regulerast om kontingentinngangen aukar eller minkar.

Utover dette har avdelinga høve til å samle inn pengar blant sine medlemmer til særskilte føremål.

Dersom avdelinga akkumulerar overskot som ikkje inngår i ei planlagt investering o.l., bør avdelinga gje løyvingar til andre organ i partiet.

Overordna organ har høve til å påpeke overfor avdelinga at trekkprosenten t.d. er for høg.

4.2. Kven kan påleggje kontingent?

Utover den obligatoriske kontingenten til sentralkomiteen er andre innbetalingar til partiet friviljuge.

Det er berre sentralkomiteen som kan påleggje medlema kontingent.

5. Kan medlemskontingenten avvikast?

I kontingentspørsmålet står avdelingane via distriktsstyret direkte ansvarlege overfor sentralkomiteen. Sentralkomiteen skal motta eit samla kontingentbeløp innafor dei ulike satsane som svarar til medlemstalet i avdelinga.

5.1. Kan ein avvike frå satsane?

Svært ofte vil alle fire kontingentsatsane verta brukt innafor ei avdeling. Ingen medlem kan avvike frå kontingenten ved å betale under sats I. Avvik frå kontingentsatsane vert berre aktuelt i dei tilfella når så mange i avdelinga ikkje kan betale lågaste sats at dei øvrige medlema kan oppvege det som manglar.

Partiavdelinga er da i ei ekstraordinær stode, og må søkje sentralkomiteen om dispensasjon for full betaling etter lågaste sats.

5.2. Endring av satsane

Det er ikkje høve for medlema å endra kontingentbeløpet frå innbetaling til innbetaling ettersom ein har god eller dårleg råd. Endring av kontingentbeløp må skje etter ein ny diskusjon om økonomisk evne.

5.3. Kan innbetalinga utsettast?

Det er vedtektsstridig ikkje å betale kontingent. Utsetting av innbetalingane skal difor ikkje skje. Normalt har ei avdeling ikkje høve til å søkja om utsetting med betalinga. Dersom ei avdeling har ein særst vanskeleg økonomi, skal dei ikkje halde attende kontingenten, men derimot be distriktsstyret eller sentralkomiteen om hjelp.

5.4. Kontingent for partimedlem/kandidatmedlem som og er medlem i Raud Ungdom eller NKS.

Medlem/kandidatmedlem som og er medlem i Raud Ungdom eller NKS, kan ikkje avvike frå kontingentføresegna i partiet.

Som medlem/kandidatmedlem i partiet bør dei i partiet sine ungdomsorganisasjonar gå foran som eit døme i økonomiarbeidet. Samtidig må dette ikkje brukast som ei orsak til ikkje å betale kontingent i partiet etter økonomisk evne. Som ein regel bør dei minimum betale kontingent i dei to organisasjonane slik at summen vert lik det medlem med tilsvarende økonomisk evne betaler i partiet.

Det understrekkast at dobbeltmedlema fyrst og framst er partimedlem og at det bør leggjast særskilt vekt på det ved fastsetjing av kontingent.

6. Rapportplikt

Partiavdelingane skal halde orden i kontingentinnkrevjinga. Dei skal overfor distriktsstyret og sentralkomiteen kunne dokumentera at det beløpet som innbetalast er riktig. I tillegg treng både distriktsstyret og sentrale organ eit oversyn over kor stor kontingentinngangen er og korleis medlema fordelar seg på satsane for å kunne budsjettere partiet si drift og planleggje det økonomiske arbeidet i partiet. Partiavdelingane skal bruke dei utsende rapportskjemaene og gje alle dei opplysningane som vert kravde. Rapportane skal leverast inn saman med kontingenten til distriktsstyret eller sentralkomiteen.

Kasserarane i partiavdelingane må og skaffe seg eit kontrollsystem som gjev oversyn over kontingentinnkrevjinga frå medlema/kandidatmedlema, og kunne dokumentera overfor avdelinga at det innkravde beløpet er innbetalt til distriktsstyret eller sentralkomiteen (kvitteringsslippen nederst på rapportskjemaet).